

野

獲

編

野獲編卷十五目錄

科場

閣臣典試

有司分考

鄉會分考

科道爭爲主考

太座師

李京山門生

薦主同咨

乙丑會試題

甲辰科首題

出題有他意

讀卷官取狀元

鄉試借題攻擊

北場口語之多

禮官誤字

榜後誤失硃卷

廷試

閣試

御史方伯相殿

孫蕡陳遇晚節

洪武開科

開國第一科

鄉會試並舉

二張忠義

吳康齋父

前甲申會元

現任大臣子弟登第

壬辰會元

馬鐸李騏同母

征叛王廢鄉試

典史再舉鄉試

舉人充吏會試

驛丞進士

鄉試遇水火災

內官子弟登第

進士給假

進士百戶

異姓

早達

納粟民生高第

外戚科目

魁元周甲子

野獲編卷十五

秀水沈德符景倩著 桐鄉錢 枋爾載輯

科場

閣臣典試

隆萬以來南宮主試例用輔臣而以詞林大僚副之已
有成規矣惟今上之壬辰列內閣者四公首輔王太倉
四輔張新建俱未至次輔王山陰以爭冊立杜門僅趙
蘭谿一人在閣遂並用詞林兩學士主之至辛丑科則
內閣二人首輔趙蘭谿久在病杜門僅沈四明一人在
閣至丁未科內閣亦止朱山陰一人遂並用詞臣如壬

辰又至庚戌科則內閣三人首輔王太倉不至次輔李晉江以避言杜門僅次輔葉福清一人在閣于時主試亦用兩詞臣是四科雖變體亦揆之理勢宜然況先朝俱有故事乎及次科癸丑內閣止福清獨相則典試應如前四科例矣而中旨忽下命葉揆入閣而起故祭酒方德清於家以爲之副是時虛綸扉以待者幾三旬一切送票本章皆自外而入條擬旨意皆自內而出法膳上尊賜無虛日真千古所無之曠典臺垣寂無一人敢言其非體者乃至舊臺臣素號錚錚臨期上疏勸駕矣次科丙辰吳崇仁以次輔領春闈而假元之事起狼狽

去國爲天下笑真所謂盛滿之後必有衰颯也

有司分考

今上壬午科以後議者謂十三省鄉試俱巡按專其事
實爲總裁而外簾府縣知推自爲分考官所聘教官雖
刊名錄中分閱硃卷毫不得干預試事其知推各看墨
卷恣通關節競取所私今宜痛革前弊以京朝翰林科
部諸官馳往典試如先朝故事若分考則盡用別省教
官之有聲者倘不足則間取本省一二知推佐之奉旨
准行以今科乙酉爲始永爲定例其年之三月將遣主
考巡按浙江御史王世揚條陳科場事宜數款其語俱

關切可行而就中一條若預知今日之弊而先言之者
疏中所列二曰議革有司分考以杜私交臣查得往年
同考試官不論省直皆用教官惟順天鄉試則間以辦
事進士或府佐及州縣正官充之此非有意如此蓋以
其待選銓曹隨便擇用此雖以閱卷而取彼非以閱卷
而來事不出于預期人自難於蚤見卽欲作弊安所措
手哉乃今謂教官識劣位卑爲人所薄欲與前項官員
相間取用是誠補偏救弊之法矣而不知今日之教官
非前日之教官也前此就教者類皆年力衰遲今則多
少壯矣前此就教者科不數十人今則或千百矣前此

教官多無志上進今則成進士者接踵相望矣前此充
考多壓於監臨等官今則隨京考入簾得專試事矣此
其識其官尙可薄乎即使果爾亦宜另爲酌處不可遽
及有司何者蓋有司之在本省屬官也其入簾則考官
也將待之以屬官則考試之體不宜卑將待之以考官
則上下之禮不宜紊此猶其小者臣聞甲科有司之在
各州縣多有從之講學作文者其聲口知之極真其情
好交之甚密今一旦使之得典試事則與前日外簾何
殊雖糊名易書與看墨卷者不同然豈能盡保無牢籠
之意如昔人所謂冒中三古者乎革弊而反以滋弊釐

姦而重以爲姦似非計之得者況平時考官各省俱已聘定足數欲減其數則苦于時迫路遙欲聽其來則不免徒勞無益將若之何而可哉臣以爲分考各官似宜仍用敎職第速行各巡按御史督同各提學官將各學年資精壯敎官嚴加考選一如類考生員之法勿徇請託勿庇私人惟擇最優者應聘前來若輩既有志于功名豈忘情于舉業以此程士自無留良若使拘拘于有司則雲貴川廣有司進士甚少亦何貴于舍外省舉人之敎官而必用本省舉人之有司乎此有司之分考所以當革也疏上下禮部時宗伯爲歸德沈龍江力主遣

京考者亦深是其說但間用知推乃其所建白不欲自
改前言遂于覆疏中云教官之外仍用知推一二人但
令按臣嚴覈姦弊可也自此以後教官日減知推日增
沿至今日每科用聘來教官止一二人亦有全不用者
本省有司平日廣闢門牆入闈各收桃李士子鑽營日
巧徑竇日多取功名如寄其京考官視有司之高名積
資者旦夕銓部臺省惴惴敬畏之不暇間或駁回二三
卷則艱然盛怒不復別呈放榜期迫京考惶懼反卑辭
謝過仍求所呈卷填榜畢事較之壬午以前倖門不啻
倍蓰矣

鄉會分考

自今上乙酉命京朝官出典鄉試其分考屬之知推以
及遷謫官後知推行取拜禁近再入會場分考者固不
可勝數然未有先會場而下就鄉試者惟吳江李龍門
周策以禮科都給事中爲壬戌會試分考官後外謫陞
山東兗州府通判又爲甲午科山東鄉試房考此則二
十年來未有之事

科道爭爲主考

自乙酉以京朝官典鄉試行之已三科而御史不甘文
柄之見奪每科必有爭執至癸巳冬而紛紛互訐愈不

休上命禮部會官議之因及主考兩司分考有司之便
否今錄其畧禮部題覆九卿科道會議曰臣等參酌大
明會典前後詔令竊謂國初之制教官主考慎選老成
端方之士皆自遠方聘至不使本省一官得預其間行
之既久法廢柄移則改而署事舉人矣又改而京官進
士矣又改而博選廷臣矣並未有以較文歸守土如近
議用兩司者蓋事外之官必立于耳目之表而後可以
專彈壓事內之官必絕于嫌疑之地而後可以操權衡
布按二司皆守土之吏向用爲提調監試而不用爲考
試杜請托絕嫌疑祖制之所當恪守者也同考試官舊

聘教職或謂品鑑稍有未精至欲改用本省甲榜推官知州知縣則又失祖制不用守土官之意且前項有司在本省屬官也入簾則考官也將仍待以屬官則取聘教職不得一體將槩待以考官則于御史二司不便相臨請御史于隔省聘取甲榜府佐推官或遷謫閒散之臣大省量用三四員小省量用二三員以爲領袖其餘仍舊聘取教職而知州知縣有地方之任者不與焉一應科場之事在外聽御史糾劾在內聽禮部禮科參駁毋得阿徇著爲定例庶職掌畫一名實不淆上然其言命永遠遵行蓋未幾而漸變以至今日則漸以有司爲

政矣王世揚疏語雖確然奉旨後稍爲部所調停此則九列與兩衙門會議乃滿朝公論今上已著爲令不旋踵而置高閣雖聖主亦無如之何矣先是辛卯春御史劉會請罷京考仍用臺臣監試禮部覆奏監臨而親校閱之事備有姦弊謹爲糾察卽京差不便總必歸重內簾當使甲科就教者復以行取以備主考舉人就教者寬以三科以備分考疏上議行臺臣不敢復爭然而不用本省有司如故也其如臣下之不奉行何

太座師

鄉會座主體嚴自難假借至座主之師則少殺矣是以

有看馬不避馬隅坐不隨行之說蓋士登甲榜便有大座師三十六人勢不得以居尊槩之況大廷會議公事糾彈有難以引嫌者往年惟甲戌科楊御史四知認太座師許新安相公爲師凡進謁俱踵弟子之後已爲一時談柄近日元靖初詩教給事用事有江西祝給事耀祖與之同垣其認師弟極稱親切蓋祝之鄉座師爲于泰常倫光祿而元則于之座師也人薄其趨時譏之云不父其父而禰其祖相傳以爲笑

李京山門生

古人以門生門下見門生爲絕盛奇事本朝固時有之

然如近日京山李翼軒

維禎

則異極矣辛未科李以編

修分考得陳大參培所

長祚

陳之門生爲癸未葉相國

向高

葉之門生爲戊戌顧榜眼鄰初

起元

顧之門生爲

甲辰楊狀元崑阜

守勤

一時同列禁近無在家者至癸

丑會試葉以首揆主考得周延儒等一榜尤爲極盛李

尙以右轄起家仕途中最爲積薪而衣鉢之傳則向來

未有綿遠如此公者

薦主同咨

士人當重座主無論鄉會皆然若作外吏遇臺剡舉薦
雖稱相知然恩地輕重相去日遠數十年來特重薦師

待以異禮幾出鄉會座師之上蓋房考座師日後升沉不可問而薦主西臺烜赫且可藉以爲援勢使然也以故近世建言諸公參劾會試大座師者屢見則大座師已登揆席次亦要地可借以博直聲而參薦主者無一人焉其向背最爲易見至于中行知推同時行取者向號同咨不過以咨文並列初無譜牒之誼自戊戌一咨候命輦下者五載青袍角帶鱗集都城匹馬過從靡間朝夕而西北大老有位望氣力者時攜壺榼作黃梅授衣故事於是一時風靡論議如出一口敦講年誼情比埧簾是時沈四明溫三原方水火次年楚王妖書諸事

起沈遂爲公議所共棄間有異同一二人旋以掃門入
幕受指目矣二十年來同谷之好更勝同榜十倍其子
弟修通門之敬亦加嚴然戊戌以前無此也今年往
還投刺俱稱年弟然先人丁丑榜中惟同館數相知稱
之其餘皆年侍生也聞一榜盡稱年弟始于乙未科不
知然否要之後日名位稍異其貴者或執舊禮而冗散
庶僚自稱年晚生至有竟署銜名不復敢書年字矣惡
睹所謂年弟哉

乙丑會試

高中元主乙丑會試孟題有二夷字犯上所諱賴首揆

徐存齋力解而止人皆能言之然實以首題爲綬之斯
來二句則下文有其死也哀爲上深怒謂有意詛呪忽
問徐此題全文令具以對徐云臣老耄健忘止記上文
有臣名與字猶天之不可階而升差能記憶耳上意頓
釋不復治使其具述語高無死所矣次年海忠介從
郎署抗疏指斥上諸過舉上必欲殺之亦賴華亭詭辭
如王生達生長富貴正復一往之苦云云因得長繫上
卽以是年冬上賓司二年徐謝政而高再起柄用海撫
江南所以苦徐者其狀幸兩公先後去位而事寢徐之
施恩出無心而報之反是不可謂非兩公之薄也

甲辰科首題

今山陰朱相公主甲辰試首題爲不知命章初命題卽約同事必三段平做不失題貌始可掄元若違式卽佳卷亦難前列同事皆以爲然旣揭榜則元卷殊不然朱氏子弟俟其出場暫憩漫叩曰大人遴擇榜首何以竟違初意朱驚起取卷讀之歎曰我繙閱時殊不覺也蓋識神似爲鬼物所掩矣朱壻張兵部親爲予言之又場表中天何言哉民力竭矣二儷語亦夢中先授之者及閱二場皆擊節歎賞謂爲成語確對且切題因以刻程蓋冥趣默相此八如此然元卷爲士子所聚譁主考有

憂之索性以冠狂對冀弭羣口天之巧于玉成至矣

出題有他意

古來考試以題譏人者與見譏于人者其出時未必有意而揣摩者多巧中之如唐僖宗時以至仁伐至不仁命題而士子作詩云主司何事厭吾皇却把黃巢比武王此語幾欲殺其人刻亦甚矣若歐陽文忠典試出通其變而使民不倦賦時謂多一而字錢氏子因作詩云試官偏愛外生兒此又援蔣之奇劾歐甥女曖昧事更爲浮薄我朝命題者無此事而正德改元實悞襲西夏李乾順故號時馬端肅秉銓出試題以嘲政府之不學

劉晦菴李西涯謝木齋三公在揆地世傳爲笑端世宗
朝語涉忌諱有厲禁鄉會試命題莫非諛詞至癸丑孟
題五百餘歲而巧極矣隆慶初元高中元以次揆聚劾
去是年應天遂出顏淵問爲邦一章以放鄭爲言蓋媚
徐華亭也斯已可矣萬厯己卯正江陵擅國之時山東
貴州第二題俱爲敬大臣則不眩尤屬可笑而南京出
舜禹爲首題致他日有勸進之疑則怪極矣壬午湖廣
出天下有道則庶人不議則江陵之桑梓媚之尤爲近
情而權相已歿不及知矣此後諂風稍衰而諷訕者漸
出戊子河南孟子出好善章後二節主意在訑訑之聲

音顏色與讒諂面諛之人所以譏切時相聞時相頗不
悅甲午應天以管仲器小命題福建以鄙夫事君命題
說者謂指蘭谿相公又謂只指石東泉司馬未知誰屬
而借聖語詈人亦虐甚矣至于已西湖廣忽出孟子孫
叔敖舉于海初見人甚疑駭後乃知爲郭江夏家居方
負相望故以此題默寓擁戴亦真能識時趨者但江夏
公正人反未必喜也

讀卷官取狀元

自嘉隆以來春榜會元大都出詞臣之門蓋館閣本文
章之府而大主考又詞林起家亦理勢使然惟今上癸

未曾元爲李九我則工部郎蘇紫溪潘首卷蘇李同已

又自幼同筆硯李舉解元久在公車名噪海內兩主考
既欣得人並天下亦無議蘇之私者此數十年奇事也
若狀元卷則必出揆地所讀方得居首間有出上意更
置前後者十不一二也惟今上乙未狀元朱之蕃則工

部右侍郎沈繼山

思孝

所讀沈居六曹貳卿之末而以

人望新起時政府四人爲趙蘭溪張新建陳南充沈四
明俱與沈同年夙稱氣類孫富平雖爲太宰與沈隙未
開亦相厚善故沈所取竟得大魁莫敢與爭亦累朝以
來僅見事也至考館選從來非相公屬意則本房分考

力薦未有外察得與者是科秦人南師重故沈撫陝時得意門人至是薦入亦列庶常皆以前所未有朱南二詞臣咸知己之恩脩門牆禮甚恪未數月沈轉官協理京營漸與孫太宰有違言彈文四起沈杜門求去二詞臣蹤跡亦頓踈矣

鄉試借題攻擊

丁酉順天二主考獨焦漪園並被議攻之者惟二三科臣皆次揆張新建客也焦以進養正圖說爲新建所痛恨而郭明龍以官寮爲皇長子講官亦深嫉之焦旣出闈卽以所撰圖說具疏呈御覽其時禍本已成矣監生

吳應鴻生員鄭棻先被斥而曹蕃張蔚然等數人則重
罰以待覆試分考行人何崇業主事費學佺等調南京
焦亦調外任蓋物情惟欲焦早離青宮講筵足矣其關
節固無影響卽指摘文體亦多借名耳焦旣補冗僚己
亥再入大計直至丙午始一補藩幕淮南司業又論罷
蓋新建厄之于前江夏尼之于後兩公非同志也時憎
焦則無異辭丙午後郭久已林居時方爲名流所宗故
人肯代爲効力

北場口語之多

順天鄉試自戊子深求之後辛卯則馮臨朐爲政時負

海內重望自愛其鼎以故故陳都諫子故邵中丞子列在元魁俱斥去別換僅免口舌甲午亦無所糾拾特以政地持平主者亦無仇家相嗾耳丁酉一役焦弱侯正在多凶多懼中忽以臨場特命使不得辭識者已知其故比榜出而省中曹大咸楊廷蘭輩露章辭雖峻刻實無關節可指況所參汪泗論張蔚然邱夢周曹蕃諸人俱名下貧士無能具苞苴者焦雖謫而已亥大計曹楊兩公亦坐新建黨逐矣庚子則顧開雍主考素以豪傑自命慮礙大拜加意防閑至預約提調府丞喬壁星凡其同鄉江南四府監生卷皆另爲一束記認之不派房

不批閱自謂極其積嚴以故三吳遂無一人得售乃榜
首浙人趙維寔已首被文體指摘蓋北人見趙卷峻潔
駭而未見儀郎某公尤忿忿至欲斥而啓靡之會同鄉
在事議罰科而止然向來被議者主試皆南人舉子皆
胄監豈畿輔子衿皆曾史耶

禮官誤字

辛卯南京鄉試中式李應傑者誤書從諫如轉圜爲轉
環禮科給事胡汝寧駁之謂當爲轉環而此子荒謬乃
寫作環此必關節語主考諭德陸可教辨疏嗤之謂一
圓字耳舉子已誤給事再誤此寧容相笑胡江西南昌

人理學名邦也又前一科戊子胡亦曾主考浙江而鹵莽乃爾同鄉恥之先是南昌一巨公張昇者在武宗時爲禮部尙書因主上新登極選宮嬪例禁娼優隸卒之家不許就選張謨隸作吏以登榜文其下力爭不聽比榜張而大譁闔京刻木輦至欲剗刃始爲改正同一邑人同爲文章司命先後以鄙受侮乃知伏獵侍郎杖杜宰相何代無之先嘉靖七年戊子順天鄉試後御史周易劾副考庶子韓邦奇試錄引用尙書元首喜哉等句錯亂截除而易疏中亦自稱謨改尙書爲禮部所劾邦奇旣降罔丞易亦降衛幕蓋易爲提學恨序中不列已

名故借端攻考官已而兩敗與胡汝寧事相似

榜後誤失硃卷

戊子順天場事竣後失去硃卷數卷禮官高桂糾場弊歸罪于主考作奸先去以滅其跡至次科辛卯應天中式七十五名錢魁春借出硃卷以燈下檢閱誤焚二三場檢舉當議罪禮臣覆奏請薄罰得旨姑宥之一時言路亦無參駁之者錢今去魁字單名春甲辰登甲榜作吏有聲同一失硃卷也而評議異同如此蓋其時司衡者物情有與有不與故當事者之苛恕亦因之非通論也今北場及會場硃卷皆以開榜時立刻送部磨勘無

復遺失事矣

廷試

正統戊辰科會榜後卽喧傳謠云莫問知不知狀元是彭時及廷試彭文憲果爲龍首不三年而入內閣天順癸未科以御史焦顯監試而火焚科場說者以御史之姓應之詔改是年秋會試次年甲申廷試于是時人爲之語曰科場燒狀元焦比傳臚則彭敎爲龍首其謠竟不驗惟庶吉中有焦芳一人後至大學士少師豈卽此人應之耶今上癸未開進呈卷中有吾鄉朱少宰興國姓旣同且名亦似佳識因拔爲首聞乙未科金陵之朱

亦然總之君父造命特偶應之耳嘉靖末年及今上近科以大力得路者改佳名以應廷對自謂芥拾鼈甲竟不如所願揆地亦付之浩歎而已宋時焦蹈登狀元是年棘闈亦被災時人云不因科場燒那得狀元焦癸未之謠蓋祖此

閣試

士人自鎖闥敷廷之外其試事最重者無如吏部之考選科道內閣之考選庶常尤爲華選先朝俱視文字爲甲乙且不拘定疆域各以義命相安今未試之前采訪居其半請託居其半甚而暮夜先容紙上之語僅免曳

白便足入穀科道本以試卷爲獨狗惟庶常自考改以後仍親筆墨朔望有閣試每旬有館課近來又多屬之捉刀人蓋挾冊傳代諸弊視里試有加焉卽博學宏詞故自不乏然才力每以應酬奪之且自初考時各省限定人數而雲貴廣西三省又每科輪選如壬辰當用貴州則是科止中一人爲馬文卿乙未當用雲南則是科止中一人爲卬祺皆未入試已知妙選屬之最爲可笑而同鄉中篋書潛遞露揭顯攻者至不避友戚年誼衰薄終身切齒往往見告今上自御極以來放進士已十六榜其不開館選者僅甲戌庚辰庚戌丙辰四科耳此

本朝翰苑稀有之盛然前戊前辰俱江陵當國自以詞
林壅滯暫停至丙戌議定每科不輟永爲例矣庚戌以
隔房取中指摘紛紛上意大疑以故屢請不報至丙辰
而羣龍無首文壇喪氣不至駢誅者幸耳何暇議及庶
常哉乃知宋世制科屢舉屢廢當亦有繇矣庚戌科請
考古士久未得旨過夏且歷秋矣諸進士中有聲有援
者各懷奢望亦各挾妬心時山東僅當取一人有三甲
守部者本魏科巨族雅負才譽自謂無敢抗衡惟卽墨
人周士皋父爲詞林大僚身亦廣交時貴意其相厄乃
作謗書遍投謂周輦數萬賂戚畹京師藉藉疑信相半

周時病困慮其或強起就試至排閣穢詈之周不勝恚而死同鄉俱恨怒周夫人至欲出疏鳴冤爲姻黨勸而止究之上終不允考聖矣神矣

御史方伯相毆

顧侍御驤字

龍楨

以行人入西臺出按廣東不甚諸吏

治而性剛戾自尊大廣州知府方遂者以部郎出守爲其所詈自罷去其下郡僚令長爲所辱者接踵以漸及于藩臬王積齋洋爲左轄素以清直著聲至是已先爲備時庚子秋試王以提調偕侍御入闈正點名散卷畢偶以一公事相爭遂詬詈至以老奴才目王王亦以惡

聲答之因兩粹于至公堂上王奮拳擊之顧不能勝墮冠弛帶以吉服而盤旋于地有邑令倪姓者名失記司外簾力爲解勸顧卽攬其裾痛毆之令故美鬚髯頃刻顛頷俱空不知王出外久矣王返藩司卽具疏言狀且請罷得旨顧革任聽勘顧疏尋至王亦去如顧勘例事下撫按又轉委之兩司俱礙直指體貌久不能結其後按臣李時華者黔人乙科竟欲坐王而直顧以藩臬不從遂兩平之時人皆知曲在侍御後京考以浮躁處之王雖不起今優游林下頗爲輿論所惜

孫賁陳遇晚節

洪武初元徵求隱佚惟恐不及同時南海之孫養建康之陳遇皆稱儒臣然而晚節則天淵矣雖開國聖人誅賞不測然實皆自取之責自洪武三年庚戌開科三試俱高第賜進士出身授工部織染局使出爲虹縣主簿選入爲翰林典籍又出爲平原主簿以事逮問輸左校尋被釋拜蘇州府經歷二十二年謫戍遼東又以藍玉黨見法蓋仕宦二十年一禁繫一從戎四爲下僚僅一入史局而不免伏鎖其著述甚多而失傳今存者祭竈一文耳當時亦何苦應舉入仕以致非命耶陳遇當太祖渡江卽以書聘之稱爲老先生比之伊呂孔明書在

御集文多不載遇赴召上大悅遂見親信授供奉司丞
不受上卽帝位三授翰林學士俱不受乃賜肩輿從以
衛士以使兩浙歸除中書左丞力辭召入禁中賜坐命
草平西詔加授禮部侍郎兼宏文館大學士復辭再除
太常少卿又除禮部尙書皆固辭命其子入直又辭甲
子秋病卒上遣中官諭祭賜塋子恭由鄉貢仕至工部
尙書遇自癸卯受上知入侍帷幄前後二十一年無日
不在太祖左右命以禁近不受命以卿貳不受欲貴其
子又不受寵眷則師臣而不改布衣以歿飾終之典視
文臣有加比之李鄴侯差似之尙嫌泌在德宗時多一

番宰相也贊起東粵萬里應制科得微官而以凶終遇生輦轂下出入禁闕而無恙者則求祿與遺榮異也當時詞臣如青田以酖死金華以憂沒而遇獨免于讒賊且造膝之語無一傳于世其品之高見之卓有劉宋諸公所不及者未可與孫贊並論也或云陳遇者自以生在元時雖不仕不忍背之故力辭顯位不特慮高帝威嚴難事也其意似與楊廉夫同遇卽世所稱靜誠先生也

洪武開科

洪武四年辛亥始開科取士得吳伯宗等此世所知也

不知先一年庚戌以明經薦至京師者上俱親策問之
賜徐大全等出身有差廣東番禺人李德者以明尙書
薦與焉授洛陽典史厯濟南西安二府經厯告改湖廣
漢陽教諭又改任廣西義寧縣致仕歸見黃泰泉佐所
爲德傳中則庚戌實開天第一科又蘇州錢氏世譜云
洪武庚戌狀元安大全則又徐字之誤也楊升菴又紀
洪武五年壬子科會元陳忠福建莆田人而狀元則爲
朱善蓋連三年三賜廷對得大魁三人而世知之者尠
矣至六年癸丑科命罷會試選河南舉人張惟等四名
山東舉人王璉等五名俱拜翰林院編修命贊善大夫

宋濂等教習而正史及諸家記載俱不書直至十八年乙丑始復會試廷試以至于今張惟者江西永豐人寓南陽遂應六年癸丑科河南鄉試以通尙書爲第一人
是年不開南宮止選惟等十七人卽授編修光祿日給酒饌太子諸王分日爲主宋濂等以上所親教不敢以師自居因侍上宴始敢請惟等爲弟子上笑而許之尋命惟等歸省墓俱攝監察御史以行其恩禮非後來教習諸士可及也時河南同選者祥符王輝河南李端洛陽張翀其云十七人蓋又在山東五人之外也

開國第一科

洪武四年辛亥始開科取士時自畿輔外加行中書省
凡十有一列中式者一百二十名而吾浙得三十一人
蓋居四分之一而會元俞友仁復爲浙西之仁和人首
藩首科盛事如此是時劉基宋濂章溢王禕輩俱浙人
一時同爲開剗名臣宜其聲氣之相感也累朝教育遂
以科第甲海內信非偶然是科獨湖廣一省無一人中
式而高麗國中一人

鄉會試並舉

洪武三年庚戌開科鄉試次年辛亥會試狀元吳伯宗
在紀載中久矣乃四年京畿鄉試以前元貢士鮑恂與

學士宋濂爲考試官而解大紳學士文又云家君以洪武辛亥主考江西則是歲鄉闈與南宮同開矣況解爲江西人卽主江西試而鮑以青衿與學士同列且居其前俱奇事也又臨江先哲錄云洪武五年八月禮部侍郎曾魯奉旨爲京畿考官則是庚戌辛亥壬子連三年俱舉鄉試尤奇之奇也雖國初典制未定而後學則未之知若連三年廷試則已紀之矣

二張忠義

洪武二十四年辛未科一甲第二名張顯宗福建寧化人拜編修歷官工部右侍郎以事遣戍興州起至交陞

左布政使卒於官此史所紀也葉文莊水東日記云顯宗舉洪武辛未狀元官至祭酒聞燕邸靖難師興遂從陝西起義兵後不知所終二說不同葉云顯宗狀元或承俗刻之誤而起義兵一事則偉矣顯宗初從工部侍郎訥戍也正代張昺之任昺爲浙江慈溪人從工部侍郎出爲北平左布政使知燕邸有異謀欲偕其僚發之爲庫吏李友直所告文皇帝捕昺斬之卽以其時舉兵立授友直爲北平布政司參議尋陞刑部侍郎尙書以至工部尙書至正統間始歿于位二張死節同官同時今惟昺之名見于史而顯宗忠義後人無能名之者革

除義士其湮沒者多矣又他書紀顯宗爲狀元不止葉文莊一人又練子寧別傳云登張顯宗榜進士第二人

吳康齋父

吳康齋以布衣薦起英宗召見特授左春坊左諭德不赴而歸今上用言官議將同陳白沙王新建崇祀兩廡偶議者不同中止然天下猶以爲缺典而不知康齋之有父溥也溥字德潤洪武時爲太學生卽奉詔使雲南宣諭再使福建閱士伍其饋遺一無所受登建文二年庚辰科會試第一名廷試第二甲第一名授翰林編修與修高皇實錄書成陞修撰又修永樂大典充副總裁

尋用祭酒胡儼薦陞司業在詞林國學二十餘年其科
名旣負遭際亦奇而人無稱之者並不知本朝有此會
元也康齋以徒步位官寮而生被寵遇沒享俎豆榮名
萬世信乎人貴自立哉康齋名夢祥字與弼以字行洪
武間吾邑嘉興有王嘉會者字原禮元末累舉不第入
我明以明經應聘至京授翰林檢討洪武十五年陞國
子右司業與祭酒宋訥左司業龔敷嚴立楷範三人俱
春秋高鬚眉鬻然太學數千人肅而畏之以老疾乞歸
特賜致仕未行而卒于官舍時年八十餘上命禮部應
天府給舟車還塋發引之日又詔沿途有司祭之而吾

鄉人已無能名之者且國初國子司業有左右二員則雖博洽耆夙亦不及知矣

前甲申會元

錢文肅

習禮

作劉子欽墓志云劉以書經中永樂癸未

江西鄉試第一明年甲申禮部會試仍第一登曾榮榜進士選庶吉士授刑部主事坐累戍廣西南丹衛仁宗登極以曾榮薦起爲江西新淦縣訓導歲滿請致仕歸以大耄終余與公生同邑學同志少而往還相好壯而相繼登朝老而先後謝事所述劉生平甚詳蓋錢以洪武壬子生劉以洪武戊申生長于錢四歲劉先舉解元

錢以永樂戊子繼登江西鄉試第一相去僅隔一科皆吉水人又同在詞林劉年八十八卒于家又五年而錢亦歿年八十九其生平交情最暱出處又同時斷無謬謬之理而歷代紀述相傳俱云是科會元爲楊相江西泰和縣人又何也子欽名敬以字行本朝南宮榜首宦途不振未有其比錢鄉會亦聯捷己丑會試第十辛卯廷試亦起家庶常官至少宗伯諡文肅弇州所紀六典文衡者卽此公也與劉榮枯迥異如此天順日錄云子欽甲申會元時去永樂未遠且李文達亦不應妄言也陸文裕玉堂漫筆亦云然而弇州直駁其誤蓋未考李

公日錄及錢文肅所作志耳

現任大臣子弟登第

弇州云大臣在事而子弟登第者成化以前俱無之此又大謬不然永樂二年甲申會元又館元楊相爲輔臣上奇姪宣德二年丁未進士金昭伯爲次揆金幼孜之姪正統元年丙辰二甲進士章瑾爲禮部左侍郎張敞之子試時竟不引例迴避瑾後亦至禮部右侍郎正統十年乙丑進士劉璉爲戶部左侍郎劉中敏之子正統十三年戊辰二甲第二名曹鼎爲首揆文忠公鼐之嫡弟文忠讀卷不迴避又選爲庶吉士景泰二年辛未二

甲進士陳僕爲都察院左都御史鑑之嫡姪三甲進士
曹景爲南京吏部尙書義之嫡姪景泰五年甲戌三甲
進士孟淮爲戶部左侍郎鑑之子耿裕爲刑部右侍郎
九疇之子羅淮爲太子少保右都御史通之嫡姪二甲
進士何喬新父文淵爲太子太保禮書甫去任半年天
順元年丁丑二甲進士許起爲次揆許彬之子二甲進
士石浚爲忠國公石亨嫡姪進士沈瑤爲南京戶部尙
書翼之子天順四年庚辰三甲進士周經爲刑部左侍
郎瑄之子俱現任大臣此皆成化以前之事也乃成化
以後弇州所紀亦未詳如成化二年第一甲第二名程

敏政爲首揆少師李文達賢之壻而庶吉士商良臣則
故相商文毅輅之子文毅卽以是年冬出山再相矣庶
吉士李瑋爲禮部侍郎紹之子成化五年己丑庶吉士
尹龍爲吏部左侍郎旻之子成化十一年乙未二甲進
士王沂爲南祭酒璵之子三甲進士章元應爲南禮部
左侍郎綸之子成化十四年戊戌三甲進士庶吉士楊
時暢爲戶部尙書鼎之子三甲進士周紘爲南刑部尙
書瑄次子成化二十年甲辰二甲進士黎民表爲吏部
右侍郎淳之子成化二十三年丁未庶吉士萬宏璧爲
首揆少師安之孫兵部右侍郎翼一作輦之子二甲進

士倪阜爲禮部右侍郎岳之嫡弟岳會試不迴避且爲
廷試提調宏治六年癸丑二甲進士王承裕爲太子太
保吏部尙書王端毅恕之子端毅不讀卷宏治九年丙
辰二甲進士劉東爲次輔健之子健不辭讀卷又南左
都御史翟瑄子銓南禮部侍郎董越子天錫俱舉進士
時越考績在京又進士許讚爲右副都御史進之次子
宏治十二年己未二甲進士謝逵爲次揆謝文正遷之
嫡第三甲進士許誥禮部侍郎進之長子宏治十八
年乙丑第一甲三名謝丕又爲遷之子以出後其叔選
不書本生父文正公名文正雖亦引嫌竟充讀卷官進

士金達爲南兵部侍郎憲之子正德三年戊辰傳陞檢討又陞侍講焦黃中爲次揆芳之子傳陞編修劉仁爲兵部尙書宇之子庶吉士韓守愚爲戶部右侍郎鼎之子進士劉崔年爲禮部尙書春之姪春辭提調正德六年辛未狀元楊慎爲次揆楊文忠廷和之子庶吉士費家爲禮部尙書費文憲宏弟正德九年甲戌科庶吉士余承勛爲首揆楊廷和之壻十二年丁丑科三甲進士李惠爲僉都御史鉞之子庶吉士葉桂章爲首揆楊廷和之壻正德十六年辛巳第一甲三名費懋中又爲文憲之姪嘉靖二年癸未狀元姚涑爲新任工部左侍郎

姚鎮子二甲進士楊惇爲首揆少師楊文忠

廷和

次子

仍充讀卷官二甲進士崔允爲駙馬都尉京山侯元嫡

弟嘉靖五年丙戌庶吉士費懋賢又爲首揆費文憲之

子庶吉士毛渠爲次輔毛文簡

紀

之子又先一年乙酉

解元二甲進士王汝孝爲兵部尙書憲之嘉靖八年

己丑三甲進士吳子孝爲南京吏部尙書一鵬之子此

後數科未之見至嘉靖二十三年甲辰而翟諸城當國

長子汝倫以試中書舍人次子汝孝以國子生登第爲

科臣王交等所劾致父子削奪然二甲進士陸亦試

中書舍人爲故錦衣帥陸松次子現任錦衣帥陸炳嫡

弟獨無一人指及蓋是時陸燾已熾非翟石門比故言
官求多于宰輔而緘口于權幸也二十六年丁未二甲
進士陳以霍爲兵部尙書陳經之子二十九年庚戌三
甲進士王正國爲吏部左侍郎邦瑞之子嘉靖三十二
年癸丑二甲進士孫鋌爲禮部左侍郎陞之子南宮試
亦不迴避仍充廷試提調三十五年丙辰二甲進士孫
鑰又吏部右侍郎陞之子三十八年己未吏部尙書吳
鵬子紹登二甲進士則倩人入試途人皆知而言路無
敢言者乃父太宰亦不辭讀卷也至四十一年壬戌少
保兵部尙書楊襄毅博子俊民左都御史潘恭定恩子

允端登第兩公辭讀卷不許二子俱二甲進士南京兵部尙書李遂子材亦以是科得雋至四十四年乙丑遂次子試又舉進士時乃父尙在位云隆慶以後耳目所及不必記矣李文達河南之南陽人程篁墩南直之休寧人何以數千里外結姻且程舉鼎甲年已二十有二乃父信現任兵部侍郎何以聘而未娶且婦翁爲讀卷首臣竟置前列當時亦無異議均不可解

壬辰會元

本朝開科以來南宮壬辰凡四見矣初爲永樂十年則林誌居首再爲成化八年則吳寬居首林以解元會元

登榜眼吳以經魁會元登狀元俱掇巍科居翰苑至嘉
靖十一年則會元林春萬厯二十年則會元吳默俱二
甲進士俱不得入詞林且兩科又考庶常而兩公竟失
之是四公者二林皆福建之福州人二吳皆直隸之蘇
州人同姓同郡同單名前則同入鼇甲後則同拜郎署
並館選見遺造物播弄奇巧極矣

馬鐸李騏同母

馬鐸者舉永樂壬辰狀元李騏者舉永樂戊戌狀元俱
福建之長樂人世傳其母先嫁馬氏生鐸再嫁李氏生
子卽帶馬姓以爲名至文皇臨軒臚唱御筆改馬爲騏

二人固同母異父兄弟也此說自幼聞之弇州記奇事亦以爲誠然及考二人志銘則殊不爾鐸之母爲卓氏騏之嫡母爲葉氏先亡繼母黃氏俱封安人未幾黃氏亦卒騏尋下世然則二人本不同母何以世有此說或因一時並貴因諱而易其姓耶是不可考矣

征叛王廢鄉試

宣德元年丙午科順天當鄉試以上親征漢王高煦不及開闡此亦創見事也又九十四年爲正德十四年己卯科江西當鄉試會寧王宸濠反亦廢試事不舉時武宗亦自北率兵親征然江西省至嘉靖元年壬午科上

命并取一百九十人以補前度之缺而宣德己酉順天之補否不可考矣

典史再舉鄉試

曹文忠鼎以典史中殿元以輔臣死土木人皆知之又但知其以鄉舉棄校官改縣尉耳初龜已中鄉試爲山西代州敎職負才不屑卑冗欲棄官再就試爲吏部駁奏遂改授江西泰和典史宣德七年解部匠至京值京師大比乞入試大學士楊士奇憐而許之遂再中順天第二人因連捷遂魁天下事見國史甚明今世徒以典史會試巍科爲奇而再登賢書抑奇之奇矣其他坐斥

去而再入穀者另記

舉人充吏會試

先朝中式舉人會試不到者降充吏如四川馬湖府王有學等後以展辨得免吏役復入會場已曾紀其事矣乃更有可異正統三年行在錦衣衛司吏莫煥等奏臣等俱中宣德七年鄉舉以疾病會試踰期禮部援例責充吏役不敢辭避第求仍許會試以圖進取上從其請夫擯賢書爲功曹固爲苛政然祖制不可違若已列胥吏復入南宮不幾辱賓興盛禮歟何不引王有學等例還其故物而就試歟因思後日宏治間唐寅徐經等亦

以望悞充吏亦可如莫煥等望格外之恩矣此等事真是異典進士以襍流起家者如驛丞吏員承差書算之屬皆同諸生鄉試也既登解籍則爲鄉貢士非復襍流矣今既降充吏役此後僅可列仕版耳仍歌鹿鳴而來則稀有之事也

驛丞進士

宣德八年癸丑曹鼐以泰和典史登狀元以爲異事而不知正統四年己未第五十九名李郁江西豐城人下書承差習禮記成化十四年戊戌科第一百五十三名譚溥其下直書山東東阿縣田縣驛驛丞習書此僅見

之會錄中耳弇州奇事述及科試考皆不之載若正統七年壬戌科一百二十一名鄭溫爲直隸松陵驛丞則弇州已記之矣

鄉試遇水火災

正統三年戊午順天鄉試首場畢之夕遇火士子試卷頗有燬廢者有司懼得罪但請脩葺場屋以畢兩試時曾鶴齡以侍讀學士爲正考官獨不可曰非再試無以滌百弊昭至公何惜一日之費不成此盛舉哉有司以二說奏上命如鶴齡言改用十五日爲首場是科更稱得士至宏治五年壬子浙江鄉試首場遇大雨漂浮號

舍不能坐立士子譁擾競散而出約束之不能止監臨御史監察憲臣俱欲罷試獨左布政劉大夏曰暴雨必有息時可令自揣能文者聽其願留勿隨衆去當以留者爲準閱其文登榜于是存者尙有八百餘人悉命還號舍雨果止于是仍如額取足數比榜出人謂得人勝他科按此兩番變故實出意外曾欲再舉以清弊孔劉欲畢試以完大典俱審時度勢切中事理賓興俱賴以告成事若相反其得體則一也按天順七年癸未會試首場亦遇火焚死舉人九十餘人則試卷尙未成文以故改本年八月再試至次年二月臚唱雖稱天順八年

而英宗已先一月升遐不及臨軒矣英廟在御鄉會二試蓋兩罹鬱攸云

內官子弟登第

景泰五年甲戌科二甲進士牛輪順天涿州人登科錄書其叔玉爲司禮監左監丞按玉橫于天順之末成化之初李文達曾面辱之至今有學士醉歸圖傳世其在景泰時何以遂登之錄且書叔亦非故事時高文義于忠愍俱稱正人爲讀卷官何以置不問也若正統十三年戊辰科二甲進士李泰順天香河縣人登科錄書父永昌見任司禮太監此必生泰後始自官入掖庭然不

書母吳氏而書其祖母王氏則又非典制矣又如景泰二年辛未科二甲進士成凱陝西西安耀州人書父敬前翰林院庶吉士時敬久從館中出爲晉府王官坐法腐刑尋從景帝潛藩入紹已陞御馬監太監而不書僅書前銜最爲得體且並書母孫氏稱具慶下則二太監俱見其子成進士亦幸事矣李泰第後選庶吉士授編修官至詹事牛翰亦選庶常授編修官至太常少卿惟成凱因病不得赴館選而父敬爲景帝所眷寵特授凱吏科都給事中尋卒又二年而敬始歿英宗北狩不返徐埕輩議南遷于謙等爭之不能得賴永昌力諍于太

后而止則永昌亦賢璫也李泰後乞封云伯父永昌立以爲嗣法不得封本生父母請封其祖父母詔允之或疑其託辭非實也

進士給假

近來新科進士選期未及者多以給假省親省墓爲辭得暫歸里其有力者則乞解銀及借各曹署閒謾之差以省僱募之費否則觀政衙門堂官代以爲請相沿不改偶閱景帝實錄景泰五年甲戌科取進士三百五十人時大理卿薛瑄奏請除一甲三人外其未授職者乞放回依親讀書帝曰科舉正要用人旣取中又放回不

如不取矣一切俱留候選景帝勵精爲治不容臣下偷安自便如此至嘉靖五年丙戌科辦事進士應禎等百人以選期尙遠乞依例放歸疏連上未允最後上切責爾等發軔科甲不思練習政體乃乞回以便已私終不許至首輔費宏等代爲請亦不從世宗聖齡甫二十正如太阿出匣諭旨森嚴正大默符先朝今之新貴圖自佚者可以憬然矣

進士百戶

英宗親征時有宣府龍門衛充軍進士張鑑者詣行在所疏乞上駐驛宣府但選將統兵征勦則兵權歸一號

令不二人有效死之心不能用及景帝登極鎮守山西都督孫安以爲言謂當時若從鑑言豈有今日之禍乞量加擢用下兵部議帝命鑑爲試百戶送大同總兵昌平伯楊洪處聽調宏治六年故兵部尙書余子俊男舉人寘乞錄其父軍功上命寘爲錦衣正千戶子孫世百戶今上辛丑錦衣管衛事指揮余茂發以考察軍政降百戶奉旨仍舊蒞事以從六品得掌司隸雄劇亦本朝所無茂發卽余寘曾孫也

異姓

天順甲申科有進士直茂登第時憲宗新卽位怪其姓

罕見問之首揆李賢對云此字音陝然而韻書未之見也正德間嬖倖錢寧冒國姓而其嬭也氏死朝士有作奠文者以也姓無出改稱也寧怒不納俾改正始受之按也字必蚺姓之誤或後人以爲不雅去虫字耳古來奇姓雖多未有若此二氏者又成化間有山東布政使胡得盛上以北虜方熾且盛字音與勝相似改爲胡靖于時憲宗何不并直姓改之雲南阿雄關土巡檢姓者羅雄州土知州亦者姓又四川雄鎮府女土官者氏卽近年招贅貴州土舍安堯臣爲壻改姓隴氏冒襲世爵以致黔撫郭子章被攻者是也此正堪與錢寧嬭也氏

作確對且錢寧本雲南人蓋亦夷姓類是者甚多

早達

憲宗朝早達者無如長沙李文正丹徒楊文襄俱以數
歲神童薦爲翰林院秀才而不知其後又有壽光劉銳
也銳爲劉文和明第四子文和雖次相受知憲廟甚深
銳以八歲召入卽授中書舍人因年幼不能佩牙牌特
製銀牌以代之出入殿廷欄檻未能趨越時丹徒楊文
襄已舉進士與銳同官乃提攜之出入楊負重名師友
造請者無虛日又好酒奕因是不得如願每歎曰此童
累我後爲劉瑾所惡勒罷用李文正薦起厯尙寶丞卿

以至太常卿兼翰林院五經博士晉階資善大夫賜二品服食一品俸立朝五十餘年至嘉靖十四年始致仕歸其進也不以科目且文藝去李楊二公遠甚卽爵位功名亦相懸夔絕然文正暮年無子貧窘憔悴以終文襄被謗歸卽疽發而歿銳以純袴起家被遇三朝富貴安樂優游林下則二公所未逮也銳頗好學喜藏書常刻同姓前代人文集數十種亦非膏粱儕輩也觀其對西樵留印記一事則固博通典故者

納粟民生高第

景泰以後胄監始有納馬之例旣改爲輸粟初不過青

矜援例耳既而白身亦許加倍輸納名曰俊秀子弟于是辟雍遂被銅臭之目且其所冀不過一命爲榮無有留意帖括者于是士子叱爲異類居家則官長凌忽之與齊民不甚別矣惟成化丙午羅文肅圭峰累試有司不錄遂以俊秀入貲舉順天解元次年登進士爲庶常顯重于詞林其年且踰不惑久矣于是士人始有刮目此輩者以余所知近年則同邑項元池名德楨亦厄於童試入貲舉北畿乙酉第三名丙戌復高第經藝爲時所式今爲參議己丑科吳徹如名正志以乃翁赴任不及試命入南監卽聯捷爲郎建言今年以光祿丞召

入矣是年又有徽州人汪以時者年五十餘尙爲孺童而酷貧其親友哀之爲納銀游北監亦連舉鄉會爲御史今已陞問卿其他不及知者必尙多也

外戚科目

錦衣周賢者駙馬景之子母曰重慶大長公主英宗女也以儒生登成化二十二年舉人時孝肅后在宮中聞外孫得雋喜甚侈以爲盛事賢南宮久不利乃以戚畹例授錦衣衛指揮僉事至宏治十六年以久不遷職乞陞兵部執奏以爲無例却之上命陞一級爲指揮同知時孝肅方稱聖慈仁壽太皇太后猶在養也至正德間

又以例降千戶又再厯都指揮僉事以卒當時外戚恩澤尙有節如此又梅純者曾祖曰駙馬都尉梅殷曾祖母曰寧國大長公主爲高帝第二女殷以嫌歿于永樂中純以世職爲中都副留守上疏請改孝陵衛以便奉曾祖父母之祀詔許之純起家三甲進士授知縣改襲祖職厯指揮使以至今官純忠貞嫡裔且起甲科卽改金吾亦不爲過而靳惜至此今之濫恩有十倍正德中葉者可慨也

魁元周甲子

宏治九年丙辰科狀元朱希周蘇之崑山人仕至南京

吏部尙書及見嘉靖丙辰狀元諸大綬次年卒贈太子
太保諡恭靖嘉靖二年癸未科探花徐階松江之華亭
人仕至少師吏部尙書大學士及見萬厯癸未科會元
李廷機去臚唱數日卒贈太師諡文貞嘉靖二十年辛
丑科會元陸樹聲松江華亭人仕至太子少保禮部尙
書及見萬厯辛丑科同邑人狀元張以誠又五年始卒
贈太子太保諡文定三公者或南宮首薦或高第鼎甲
俱詞林鉅公榮哀始終名德無玷登第周一甲子而始
下世皆在吳中數十里之內盛哉

野獲編卷十五終